

《連坡新詠》

不意

不意歲除傷老大，迷途荏苒磨前塵。
忍看慈親飾華髮，舊衣還作連城珍。
憶昔童稚如病雞，竟夜無寐頻號啼。
尋醫徒損四立壁，起居常伴風淒淒。
幸有仁戚相慰過，遠遺舶藥除癘瘥。
哀哀勞瘁我寡母，拊兒豈論蒿與莪？
前月儕輩標梅遂，冠蓋雲集盡歡醉。
商賈嗷呼似沸羹，座中腐儒獨憔悴。
屬文從來闕綵筆，燈下苦學蛾子術。
祇今流習唯矜奢，誰倩青衫責名實。
願乞終養敢憚煩，囊篋空澀何足論？
又值臘尾復春日，芥菜哽噎和淚吞。

病榻侍親感賦

誠知物有壞空劫，病榻久侍意難平。
親舊疏淡怯相顧，俄爾默坐俄暫行。
祇道醫方未善驗，同根誓言共枯榮。
合什連誦彌陀號，聲出瘖啞淚欲傾。
側見雛兒還無賴，廳廊戲娛如忘情。
憂惶疾首豈所願，風息棘心仰誰萌（詩曰：凱風自南，吹彼棘心）？
放廢孔教應罪我，再跪蓮座求全生。
微芻一束何足問，報得春暉逐寒更？

春野獨行欣逢苦楝

幽香漠漠過阡眠，花發野蹊徒可憐（又，苦楝閩語音近可憐，故諱植於門庭）。
纔與凝珠同聚散，又隨飄絮各顛連。
篤材端保椽樑固，苦實能維臟腑全（楝實味苦寒，乃心腹痛及疝氣要藥）。
最是不憂貧瘠地，我今逢子一心便。

南京訪學夢憶——代友人作

陌地遊學堪寂寞，綺心初動綠蘿樓（南京大學校園一景）。
泰山靈殿香偕捻，越水幽橋影共留。
曉覺黃粱猶寡耦，夜停紅燭是他逌。
古來寒士歸零落，誰計詩成價莫酬。

詠國道林口坡段杜鵑

前月爭華林口道，杜鵑今散更無生。
拋枝每逐車痕碎，隕地端添草色明。
總乏詩家傳雅韻，徒勞蒔匠掃幽情。
遊人鎮日麟麟過，遠赴芳郊賞落英。

寄懷偉倫

獨對殘春雨漲池，懷君愁遣步催詩。
沉痾遠往千山外，別夢驚回五夜時。
遙憶青衿秉燭日，新盟白髮繫莢期。
爾來蟬唱今宜解，爲迓薰風永世吹。

聞龍川兄養生高論

頭涼足暖尋常事，將息無心類斃屍（瑜伽有大攤屍一式）。
倩問從來何太瘦？世尊三昧更療飢。

戲蝶——兼調友人

自是金裝堪栩栩，留連戲舞負香風。
莫因貪逐莊生夢，錯失佳期萬艷中。

觀霧

中夜長觀星，晨起遍茫渺。
天壤遂冥合，陰陽不復曉。
望斷止三尺，蟲唧正擾擾。
縱我蔽聰明，生生豈得矯。
感物紛如斯，逍遙泯大小。

何待驅霧散，強辨鵬與鳥。

春夜聽曲

纖手未輕啓，珠喉還費期。
沉吟緣誰故，今始歌相思。
纔拂冷弦響，忽聞仙籟吹。
斂眸曼低唱，綺懷托瘦詞。
燈聚疑送暖，春妍妒翻滋。
遊子佇隅落，片影徒棲遲。
忍拋鵲橋夢，慣看人面移。
腸迴喜悲轉，沾襟任所之。
曲罷幽情漸，流波交更垂。
滿座俱摒息，餘韻重迷離。
拊掌隨來客，愛憎聊自欺。
層翳沉懸隔，寸心意何爲？

善導寺弔登耀

崎嶇俱往矣，獨我弔君前。
難耐莊嚴唄，卒堪寥落煙？
鉤玄無忌祖，沉醉欲逃禪。
香客長經眼，清明禮佛天。

讀東坡論詩畫作意偶成

點染徒形似，雛兒識亦高。
指山差一髮，顧頰益三毛（二句用東坡詩及顧愷之畫裴楷典）。
寂寂雲林致，幽幽鹿柴操。
意非江海客，郊島苦含毫。

中大校園賞花有懷

門徑匆匆掃，春泥寡落紅。
枝延花更鬧，履過草彌童。
自愛開無主，誰堪覓折衷。
拾遺如稱意，不復造天工。

贈周君

錫類從來事（詩曰：孝子不匱，永錫爾類），凱風扶翰林。
才通堪尙古，業習諒推今。
冷對彭仙隱，謙從扁鵲任。
千施臻聖手，三致濟民心。
豈懼清難飽，長憐翳愈深。
江湖龍虺雜，仰不疚浮沉。

春雷

午枕新雷破，鄰催納曝衣。
故園心未已，雙袖溼難晞。